

Elisabetta Falchi presidente de Confagricoltura Sardinna: non bi cheret una retzeta solu ma unas cantas soluzionis addatas, istudiadas dae su puntu de vista tecnicu–econòmicu pro dare impostas concretas a sos problemas territoriales e lobrare sos obietivos chi nos amus postu.

Una fèmina forte e concreta, avesa a istudiare e afinigare sas chistiones pro agatare soluzionis addatas. Fortzis caligunu s'at a èssere ispantadu ca ant numenadu Elisabetta Falchi comente presidente de Confagricoltura Sardinna, ma su direttivu rezionale at crètiu in issa, ca cun s'andala sindacale e su traballu in su sartu, at dimostradu de àere sas capatzidades e sas cumpetènzias pro batire novidades in unu setore chi est semper mudande e chi est colende una crisi comente mai est capitadu.

Su passazu dae Gigi Picciau, presidente de Confagricoltura pro ot'annos, l'at fatu abellu abellu a pustis de un'andala de traballu in pare. Elisabetta Falchi est presa a filu dòpiu cun sa terra e sa massaria.

Ghiat un'impresa agrìcula de famiglia de 130 etaras a lados de Aristanis, chi produit mescamente sèmene pro rosu, ma finas ortalìzia, tamata, sindria e laore.

Laureada in agrària, zai in antis de agabare sos istùdios a 23 annos ebia, a pustis chi est mortu su babu, at dèpidu chèschere in presse, lassande a bandas su disizu de biazare, fàghere istùdios e esperiènzias a s'èsteru.

Cun una fortza chi fortzis non pensaiat mancu issa de àere, at ghiadu s'azienda. Cussu chi a cumintzu pariat petzi una punna pro su setore, belle deretu est diventada una passione chi nche l'at leadu coro e mente e chi l'at permitidu de amodernare s'azienda, mantenende semper sa traditzione de famiglia.

S'ùnica de sas bàtoro sorres a àere istudiadu agrària, s'est dada ite fàghere e dae deretu at cumintzadu a traballare in su sartu, faghende unu pagu de totu.

A cumintzu at chircadu de imparare dae sos dipendenti suos etotu, chi conoschiant bene su traballu, a sos cales at imparadu sas conoschènzias tècnicas e científicas chi issa at istudiadu. S'est posta semper a sa proa, sapindesi chi sa teoria, a s'ispissu, est diferente dae sa pràtica.

“Dae deretu mi so ocupada de sindacadu – narat sa presidente de Confagricoltura Sardinna – ca apo pessadu chi in una rezone che a sa nostra chi at medas cumpetènzias lezislativas in sa massaria, diat èssere istadu de importu a intervènnere e dare unu contribu.

A 30 annos so diventada presidente de s'Anga de Aristanis, s'assòtziu de sos zòvanos de Confagricoltura, e mi nde so ocupada pro unos cantos annos. Apo semper apretziadu s'apentu de babu, ma l'apo cumpresu a beru cando apo cumintzadu a traballare. Petzi tando difatis apo cumpresu cantu fiat a beru appassionante custa zenia de traballu. Biere sos laores chi creschent finas pro more de su contipizu tuo e de su tempus chi l'as postu, est una istifatzione chi no at preju.

Est probàbile chi siet pròpiu a pustis de s'esperienza in s'Anga, inue si traballaiat chircande de lòmpere a resurtados concretos, chi mi diat agradare a traballare in custa manera finas in Federazione, cun s'azudu de sos collegas de su Direttivu, dandeli incàrrigos a segunda de sas cumpetènzias de cadaunu, chi depent èssere abaloradas.

Credo chi cherzat - narat Elisabetta Falchi – a parare fronte a sos problemas pigande:los unu pro unu, setore pro setore, a manera de averguare pro cada compartu sos problemas chi li pertocant e favorèssere un'andala aposita e lòmpere a sos fines chi nos amus postu. Custu si podet fàgher aumentende sa conoschènzia e ponende:si a fàghere chircas e a istudiare.

Sa massaria in Sardinna cambiat cunforma a su logu. Sas soluzionis chi si podent agatare pro sos allevamentos intensivos de su paris non podent, pro nàrrere, andare bene in su monte inue podet funtzionare su turismu in una bisione de multifunzionalità.

S'isbàlliu chi amus semper fatu in Sardinna est de providere una retzeta ùnica de addatare sena distinzione e in totue, cando imbetzes tocat de agatare pro cada s'ingula chistione, un'imposta aposita.

Su matessi discursu balet pro s'aunimentu de su frutu chi pro unos cantos compartos est istadu ùtile meda ma non semper est a beru netzessàriu. Menzus a no arrùere in sos prezuditzios e analizare soluzionis s'ingulas cun unu critèriu tècnicu-sientificu, sena trascurare de pigare dae s'esperientzia positiva de àteras rezones.

Creo chi oe siat de importu a fraigare una retza e a si cullegare totora cun Roma, sa sea de Confagricoltura natzionale.

S'intenzione mea pro su tempus benidore – sighit sa presidente de Confagricoltura – est de fraigare propostas ùtiles de batire in assessoradu, de nos fàghere ascurtare pro resessire a cambiare sa politica rezionale.

Cheret chi sas rechestas nostras benzant acolozidas a manera de garantire su gastu de su dinare e de lu pònnere in sa filada zusta, otènnere efetos positivos pro su territòriu, allestrare e gastare menzus.

Su cunfrontu est un'àndala netzessària chi non podet èssere trascurada. Galu como – contat Falchi – m'agato a discùtere de chistiones chi argumentaiat babu meu 30 annos a como, comente dimustrant unos cantos documentos chi apo agatadu. Pessamus a sos Cunsòrtzios de Bonifica chi, finas pro una neghe de una leze chi si bidiat dae deretu chi b'aiat cosas chi no andaiant bene ma chi no ant mai mezoradu, no ant mai postu in pràtica e mascamente no ant mai finantziadu comente si tocat, s'agatant como a parare fronte a problemas semper prus graes. So segura – concruit sa presidente de Confagricoltura – chi traballende paris, amus a èssere a tretu de faghene a beru su chi pertocat in custos tempos a una organizazione de rapresentàntzia comente Confagricoltura cheret èssere, e duncas cussu de agatare e inditare a sas impresas sotzias nostras, sas àndalas pro essire dae sa crisi”.